

«БЕКІТЕМІН»
Қазақстан Республикасы
Оқу-ағарту бірінші вице-министрі
Ш.Каринова
2022 жылғы « 31 » тамыз

**«Қазақстан Республикасы колледждерінің үздік 100 студенті»
республикалық конкурсының
ЕРЕЖЕСІ**

1. ЖАЛПЫ ЕРЕЖЕЛЕР

1.1 Осы Ереже «Қазақстан Республикасы колледждерінің үздік 100 студенті» республикалық конкурсының (бұдан әрі - Конкурс) мақсаттарын, күтілетін нәтижелерін, қатысушылар санатын, ұйымдастыру және өткізу тәртібін айқындайды.

1.2 Конкурс техникалық және кәсіптік, орта білімнен кейінгі білім беру (бұдан әрі – ТЖКБ) ұйымдарының 100 үздік студенттерін тануға бағытталған.

1.3 Конкурс «Жалпы білім беретін пәндер бойынша республикалық және халықаралық олимпиадалар мен ғылыми жобалар конкурстарының (ғылыми жарыстардың), орындаушылар конкурстарының, кәсіби шеберлік конкурстарының және спорттық жарыстардың тізбесін бекіту туралы» Қазақстан Республикасы Білім және ғылым министрінің 2011 жылғы 7 желтоқсандағы № 514 бұйрығы негізінде өткізіледі.

1.4 Конкурс жыл сайын ұйымдастырылады және өткізіледі.

1.5 Конкурстың мазмұны мен тәртібі тәуекел элементтерін қамтымайды, пайда немесе өзге де кіріс алу мақсатын көздемейді, тек ақпараттық сипатта және осы Конкурс Ережесіне сәйкес өткізіледі.

**2. КОНКУРСТЫҢ МАҚСАТЫ, МІНДЕТТЕРІ МЕН
КҮТІЛЕТІН НӘТИЖЕЛЕРІ**

2.1 Конкурс талантты жастарды қолдау, жұмысшы біліктіліктерін және білім, дағды мен дарын арқасында жетістікке жеткен ТЖКБ ұйымдарының үздік студенттерін қолдау мақсатында өткізіледі.

2.2 Конкурс міндеттері:

- ТЖКБ ұйымдарының үздік студенттерін анықтау, марапаттау және көтермелеу;

- ТЖКБ ұйымдары білім алушыларының кәсіби құзыреттілік деңгейін арттыруға және көшбасшылық қасиеттерін қалыптастыруға ынталандыру;

- жеке және кәсіби өсудің тиісті бағдарламаларын іске асыратын ұйымдарды тарта отырып, шеберлік-сыныптар, тренингтер және курстар ұйымдастыру арқылы үздік студенттерді одан әрі дамыту үшін мүмкіндік жасау.

2.3 Күтілетін нәтижелер:

- әлеуетті жұмысқа орналастыру мақсатында кадр резерві ретінде жұмыс берушілерге ұсыныс беру үшін колледждердің үздік студенттерінің деректер қорын құру;
- «TVET AWARDS» рәсімінде 100 үздік студентті ресми марапаттауды ұйымдастыру және өткізу;
- студенттердің одан әрі дамыту үшін шеберлік-сыныптар, тренингтер мен жеке және кәсіби өсу курстарынан өту;
- БАҚ, әлеуметтік желілер мен Интернет-ресурстарда үздік студенттердің жетістіктері туралы материалдар жариялау.

3. КОНКУРСҚА ҚАТЫСУШЫЛАР

3.1 Конкурса Нұр-Сұлтан, Алматы, Шымкент қалаларының және облыстардың ТЖКБ ұйымдарында білім алатын студенттер қатысады:

- қоғамдық бірлестіктердің, студенттік өзін-өзі басқару және еріктілер қозғалысы ұйымдарының мүшелері;
- аймақтық, ұлттық және халықаралық WorldSkills чемпионаттарының және басқа да кәсіби шеберлік конкурстарының қатысушылары мен жеңімпаздары;
- ғылыми конференциялардың қатысушылары мен олимпиадалардың, түрлі конкурстардың, спорттық жарыстардың жеңімпаздары;
- мемлекеттік жастар саясатын жүзеге асыру шеңберінде жұмыс істейтін бағдарламалар мен қызмет бағыттарына қатысушылар;
- шығармашылық ұжымдардың өкілдері;
- жобалар, инновациялық идеялар, стартап-жобалар авторлары.

3.2 Соңғы үш жылдағы Конкурстардың жеңімпаздары жобаға қайта қатысуға құқылы емес.

4. КОНКУРСТЫҢ ҰЙЫМДЫҚ ҚҰРЫЛЫМЫ

4.1 Қазақстан Республикасы Оқу-ағарту министрлігі және аймақтардың жергілікті орындаушы органдары Конкурсты ұйымдастырушысы болып табылады.

4.2 Конкурсты ұйымдастыру, үйлестіру және өткізу бойынша жұмыстарды «Талар» КЕАҚ (бұдан әрі – Оператор) жүзеге асырады.

4.3 Нұр-Сұлтан, Алматы, Шымкент қалаларының және облыстардың білім басқармалары (бұдан әрі – Бірлесіп ұйымдастырушы) Конкурстың республикалық кезеңіне кандидатураларды іріктеуді көздейтін аймақтық деңгейдегі Конкурсты ұйымдастыруға және өткізуге жауапты болып табылады.

4.4 Оператор:

- Конкурс туралы ережені әзірлейді және өзектендіреді;
- Конкурстың республикалық кезеңін ұйымдастырады және өткізеді;
- Конкурстың өткізілуі туралы ақпаратты өзінің ресми интернет-ресурсында, әлеуметтік желілерде орналастырады;

- түрлі стейкхолдерлерді тарта отырып, Конкурс жеңімпаздарын марапаттау рәсімін ұйымдастырады және өткізеді.

5. КОНКУРСТЫ ӨТКІЗУ ТӘРТІБІ

5.1 Конкурс онлайн тіркелуге және қатысуға өтінім беруге арналған платформа орналасқан TOP 100 OUTSTANDING KZ TVET STUDENTS Интернет-ресурсында, онлайн режимде күнтізбелік жылдың қыркүйегінен қарашасы аралығында өткізіледі.

5.2 Бірлесіп ұйымдастырушылар күнтізбелік жылдың қыркүйек айында Конкурстың республикалық кезеңіне қатысатын 10 (он) жеңімпаз студентті анықтау үшін Конкурстың аймақтық кезеңін өткізеді.

5.3 Бірлесіп ұйымдастырушылар күнтізбелік жылдың 10 қазанына дейін top100@tvvet.kz электрондық мекенжайға Конкурстың аймақтық кезеңінің жеңімпаздары тізімін жолдайды. Өңірлік кезең жеңімпаздарынан өтінімдерді қабылдау онлайн режимде күнтізбелік жылдың 11-31 қазаны аралығында Оператордың платформасында өтеді.

5.4 Үміткерлер Конкурстың финалдық кезеңіне қатысу үшін өтінімге келесі файлдарды қоса тіркейді:

- 1) Конкурсқа қатысуға уәждемелік хат (350 сөзден артық емес);
- 2) қатысушы өзін болашақ маман ретінде таныстыратын және өзінің белсенді қоғамдық қызметін жариялайтын бейнеролик (2 минуттан аспауы тиіс, [Youtube.com/Aitube.kz](https://www.youtube.com/Aitube.kz) бейне-хостинг сервистерінде орналастырылған бейнероликке сілтеме жасау);
- 3) білім алып жатқан мамандығы бойынша аймақты/республиканы дамытуға арналған өзінің жобасымен таныстыру (презентация 7 слайдтан артық болмауы тиіс);

5.5 Конкурсты ресімдеуге қойылатын талаптарға сәйкес келмейтін материалдар Оператормен қабылданбайды. Конкурсқа қатысушылар жолдаған материалдарының мазмұны мен ресімделуіне жауапты.

5.6 Күнтізбелік жылдың қараша айының 1-15 Конкурс платформасында онлайн-дауыс беру өткізіледі. Байқау жеңімпаздары онлайн-дауыс беру қорытындысы бойынша анықталады.

5.7 Конкурс жеңімпаздары туралы ақпарат Оператордың ресми интернет-ресурсында орналастырылады.

5.8 Конкурс жеңімпаздарын марапаттау «TVET AWARDS» ресми рәсімінде ұйымдастырылады және өткізіледі, оның аясында студенттерге мастер-класстар, тренингтер мен жеке және кәсіби өсу курстарынан өтуі қамтамасыз етіледі.

5.9 Оператор және Ұйымдастырушылар Конкурс барысын кеңінен жариялауды қамтамасыз етеді, Конкурсқа қатысушылар мен жеңімпаздар туралы ақпаратты БАҚ-та, әлеуметтік желілерде және Интернет-ресурстарда жариялайды.